

國朝駢體正宗續編

國朝駢體正宗續編卷五目錄

擬酈道元水經注序

顏君猷聽秋草堂詩鈔後序

農具詩序

溫伊初梧溪詩畫冊後序

擬小除夕南園舊社祭詩記

濂泉補梅記

寄蔡樹百光祿書

新建粵秀山學海棠碑

沈伯睂遺集序

柏靜濤師薜籐吟館集序

李鋤畬自適齋詩序

孫伯澂讀雪齋詩集序

左夫人碧梧紅蕉吟館詩稿序

薛慰農司馬香草閒情詩序

潘順之吉士岱頂看雲圖序

五湖漁莊圖序

帝女花傳奇序

帝女花傳奇自序

與汪甥鏡初書

靜樂軒玩月記

華山游草序

國朝駢體正宗續編卷五目錄

國朝駢體正宗續編卷五

嘉興張鳴珂公束輯

擬酈道元水經注序

譚瑩

九州之外皆水也流於無形成其至德三五之世物有其官少皞之後是爲元冥以迄臺駘爰洎神禹厥功茂矣莊周曰支川三千班固曰中國之川原以百數水官失職蔑由廣記其離合博徵其異同也歷代史志曾匪專書因時特編緣事補緝水經著誤義例謹嚴顧標名而支派不窮列目而源流靡析無從疏證曷可推求夫卉服洊至於垂衣而垂衣必本於卉服椎輪輒趨於玉輅而玉輅實肇於椎輪枵始難工自昔然矣余夙期絕學本乏通才家有賜

書門猶列戟飲河學鼠語海同鼃豈褰裳之不思果濯纓
其誰取治郡之聲名頓損封侯之材氣歛然得企元珠汲
同修綆焉可息也然五嶽之游定知何日千秋之業遽讓
古人誰詡積薪徧思杭葦不揣謏陋輒述水經願言注輯
合成四十卷韓詩外傳曰天地以成羣物以生國家以甯
萬事以平此智者所以樂於水也實比漏卮珍如敝帚謙
讓靡遑矣洪纖本異通輟亦殊或墟圃互纏或澗瀾交引
鴻河巨瀆涓澮潄潄波下尾上源釐然悉綴未妨刊誤仍待
拾遺訪地脈川驗程準途故自無爽夫河渠之利狂於齊
桓而禍劇於漢武豈刻舟以求劍誰閉門而造車果畫地
以成圖異闕天而握管慨自中原板蕩海水橫飛溝洫久

湮污萊彌望大魏之興百廢具舉而杏花菖葉斥鹵可虞
瓜蔓荻苗津梁遂潰尋原竟委陳迹倘存補缺裨殘苦心
誰諒但遠昧鴻荒近遭陽九毗連塞北直跨江南鶴言城
郭之非鼇戴河山以去嗟陵谷之無定痛滄桑之靡常疑
以傳疑灼焉者寡證以古書參之別集叩之吉金貞石訪
之樵隱漁商史有闕文謹俟來者所由尋考指歸發明奇
趣實冀疏盈瀉溢培薄增卑深論便宜以相難極行殊郭
象注甯竊乎子期才愧左思序敢託之元晏

顏君猷聽秋草堂詩鈔後序

譚 瑩

瑩髫齡時卽耳同里顏孝廉君猷詩名陸澄讀書誰量卷
軸王摛隸事敢爭簞扇鸚鵡賦成中郎袖稿榴柑文就孔
璋碎節篇什則令名夙擅鉅公方嗟賞而書辭藻爲後進
所宗好事或流聞已徧弱冠後乃贅絃韋通縞紵人則舊
雨今雨巷則青楊白楊王江結契友是忘年崔盧對坐情
深懷古王秀之傾慕宗測幾欲畫形陸慧曉近並張融屢
聞命駕越二歲而君猷沒矣長淮絕涸半嶽摧峯月死珠
傷芝焚蕙嘆任敬子少時常恐竟屈指以難幾王仲祖疾
亟慨然重悲懷而莫已猶憶辛夷館裏玉茗廬中樹古池
平階閒人靜清言畢景逸氣橫雲聯袂爲越井之游襍被

赴雲山之約曾匪浹旬俄驚隔世執孝經老子空懷風調
於平生值美景良辰宛晤獻酬於微聞有道之碑文誰泐
王微之圖籍僅存是可傷已聽秋草堂詩鈔一卷令弟方
谷所編也零珠屑玉片甲一鱗謝文靖之碎金江醴陵之
尺錦燕沒所餘誰珍享帚凋殘之後半付羽陵噫其酷矣
夫駿馬倏化本具雄姿驚鳥哀鳴冀留勁羽使其嘔心吟
就等身著成藏有名山付之文苑千秋之得失偉於旂常
一集之流傳榮於令僕則馬卿雖天茂陵尙購遺書偉長
縱逝子桓爲輯中論慰結習之同嗜足名家而靡慙胡乃
風流頓盡纂述不多未遭投溷之慘幾有覆瓿之慮應瑒
足以著書良可痛惜盛靈所以稱嘆要有大名然而徐樂

一書阮咸三語上拙不存乎多寡題署曷資於繁富矧此
吟詠具有性情哀感頑豔思清緒密戴角者無上齒其將
不脛而走乎爰襄讎校屬付琬鐫編璫截貝詎等砭砭素
練輕縑曷慙錦纂鳴絃已輟敢論伯氏之琴撫卷彌嗟載
咽鄰人之笛

農具詩序

譚瑩

小正月令無逸幽風農務亟矣耒耨之利取諸益者神農
錢鏐之庠受厥明於上帝農具悉矣余菽麥未知樵蘇不
爨帖裁乞米詩誦伐檀獨吾輩以目耕匪將軍而腹負貴
農重粟宛然匡濟之談問舍求田易短英雄之氣茲以兼
旬避寇八口依人間甚閉門居然賃廡誅茅無地種豆何
年豔說邨居徧詢田事製原古樸如繙未見之書趣特蕭
閒彌切耦耕之願艱難締構無其事者有其功苦爲分明
少所見而多所怪今夫不如老圃不如老農期以大人之
學也四體不勤五穀不分依然儒者之恥也吾人生計首
重田蠶耕者逸勞仍關器用是翁均期以足穀惟士獨廩

夫無田竊嘗讀爾雅檢釋名周禮考工班史食貨桓寬則
論參鹽鐵宗慄則記沿歲時汜勝九穀之書崔實四人之
令本隋書或揭齊民之要或該農政之全以至事物紀原農

桑通訣三才圖會庶物異名趙孟頫之耕詩馬一龍之農
說業經詳載究未了然則以歲月年深朔南地異方言迥
別功用不同或以意爲轉移或因時而迎距釐然親覩端
勝習聞已爰仿昔人漁具詩作農具十二詠鷗邊犢外業
同父老團欒星晚露初飽閱江湖滋味邨春鄰火偏來局
外之人雨笠煙蓑一例農家之子所冀十雙買得投老躬
耕鬻書典研而不辭乞竹分花其亦緩風企蕭大園之言
志誰學宗少文之臥游居有石湖樂府譜邨田之什歸同

甫里叢書增未耜之經爾

溫伊初梧溪詩畫冊後序

譚瑩

梧溪者登雲之麗矚也傾岑阻逕累嶂聯巖款跨紆縈抱
含吸吐碧玉瀉其漣滴白龍涵其巨波引雙派之古潭緣
萬石之空瀨赭岸藏日丹崖刺天沃霞盪雲挺壑盤址山
影相錯水聲瑤然波色瀾文出沒搖漾湍走浪激轟如雷
霆煙流月迴淨若醺醺境旣深眖中復夷衍晨晷夕雁翺
翔於其上名蟹佳蝦踴躍於其下開滌清明深沈幽翳松
篁夏秀則百谷俱青蘋藻冬生則竟川含綠峯紆嶺駐巒
層岫衍旁有石室砒然中開嵯峨千殊詭怪萬變錦嶂壁
立疑爲洞門綺田砥平次見堂廡突兀橫聳可支素琴璫
瓏仰空乃覲漆簡誠參寥之勝概習靜之幽致者也山川

阻深人迹罕至漁商樵隱習而弗奇地誌山經闕而靡錄
溫子以煙霞痼疾杖履往游秀情共馳靈境乍闢窈窕尋
壑崎嶇經邱騰崑降深仰矚俯映借訪荔蘿談討芝桂觸
岫延賞尋梁契心旣達妙旨斯傳翰墨柳州之記昌谷之
詩元結之銘李邕之序莫不暢餘陰於林薄寄幽懷於山
澤者焉閒徵好事迭賦英篇曲江樓上特繪珍圖謂南秋
水園中遠貽雅詠謂伊壘卿太守裒然成帙命綴小言古寺傳觀
幾如坐對經年展玩足洽臥游已辛巳與伊初同寓訶林
已閱十月嗟嗟山長水遠川陸多奇地老天荒林泉終閔靈
秀自鍾於開闢荒延實藉乎品題不有佳游奚徵勝地若
梧溪者媛徒之所棲託歸族之所嬉處得溫子而名齊於

素玩景備於幽賞酈道元曰山水有靈亦驚知己於千古
者非與當年探陟知抗蹟於龍門他日娛游願希蹤於禽
夏

擬小除夕南園舊社祭詩記

譚瑩

昔唐賈長江於除夕祭詩泊我

朝洪稚存太史仿而行之張船山太守繪圖吳穀人祭酒
作記洵迎年之韻事餞歲之間緣矣惟是偏隅多難瀕海
皆兵宛然臙水殘山亦有檐簷蓋軸爲賊何能習膽從軍
各欲捐軀衛玠言愁劉琨傷亂孤城晝寂萬戶冬寒人盡
終童但有請纓之志誰非傳永曾無磨盾之期風雅道衰
娛游興減矣然而結習未忘端居多暇心似彈棊之局身
無遁甲之方颺閃旌麾森嚴刀斗杜拾遺之隱几獨愛看
山陳正字之閉門仍耽覓句淒然觸目倍切傷心默爾撚
鬚不徒叉手蕭閒半載閱歷三時不無弔古之篇亦有懷

人之作憑誰潤飾傳或待於評量勞我精神祭宜同於堂
贈則有敦槃老宿車笠舊盟喜今我之同心慕古人而低
首紙窗竹屋別有因緣岸柳江梅翛然寄託相與共詣乎
南園蓋前明十先生吟社也落葉積除脩篁夾迳衰草慘
綠狂花妖紅薤田欲平桂宇特敝謁孤忠之遺廟劫話滄
桑愛老佛之同龕緣參香火桃符剛換合奏神弦竹爆不
聞寂開詩境於是酌荔酒薦蘭肴脯精誰嘗香花遞供恍
陳經而共拜憐享帚而自珍李記室之襴襦任遭同館之
割白樂天之剗剗待作名山之藏星霜易周風雨如晦信
真靈之位業儼列宿之光芒知聲價之頓增實心魂之相
守詩多紀事集又編年盱衡千秋厯覽當代屑草木之同

壽諒鬼神之共歆文靖碎金或擁鼻而如答王孫餘錦仍
嘔心而不妨已嗟嗟日月寢馳河山如故抱戮力中原之
願值橫流滄海之時避地無由依人何所誰如抱膝之略
但作裏頭之吟縱偶流聞何關興替獨是連邨焚掠闔境
逋亡或同王粲之離家或似梁鴻之賃廡獨能倚裳連襪
範水模山恆擁破硯以枯吟仍設芳樽而共賞興居無恙
此生合是詩仙文字有靈爛醉恰同司命洵厚幸已殘年
小集尋恆魚菽之儀來歲

太平跌宕鶯花之局共卜抗風軒古居然禮斗壇同特覺
新題聊沿故事野衲迎客鄰翁笑人非同偏嗜所存住簡
寂觀中而鑄像仍願宗風丕振挹文獻祠前之瓣香爾同

集者若干人人各賦詩而僕爲之記時咸豐甲寅小除夕
云

濂泉補梅記

譚瑩

濂泉寺在白雲山麓蒲澗之左鳴泉噴薄碎石迴環奇峯
鬱盤飛瀑幽折徧蒔雜卉原多古梅地異銅坑境通香界
亦附郭知名之寺而彌年索笑之區也歲在甲寅萑苻四
起兵燹所及落角摧牙束同揚水之薪斯比墓門之棘唱
落梅而誰聽賦枯樹以無由鶴夢荒寒蜨魂悽斷滄桑小
閱不徒龍樹之哀花水澄觀一例牛山之感茲者全銷劫
運復際昌時聞好事之招邀集同人以商略脩完古剎補
植名花隱夙慕乎孤山派原分於大庾懸繡旛而禱佛搥
羯鼓以迎神格彌古於杪羅香倍濃於薜蘿松篁交蔭俾
聯三友之盟蘭菊叢生同讓百花之冠或移從花埭或載

自蘿岡丹竈泥清甘溪水淡地饒三畝樹約千株鋤明月
以生香耕寒煙而種玉種徒廿本笑閨閣之題詩開到五
分報城闔而命酒煙蓑雨笠偶寄閒情粥鼓齋魚藹然清
供錦屏醉倚誠齋何媿謫仙冰壺熟眠句曲原稱外史當
同鐵腳朗吟秋水之篇何必縞衣又作羅浮之夢嗟嗟化
元鶴以歸來人民如故撫銅駝而太息荆棘森然差喜香
火緣深華嚴劫換宮開兜率妝點湖山麻檢樓羅評量花
木悟榮枯於造化心迹雙清藉呵護於神仙色香俱韻爰
書小記具勒貞珉嘆轉轂之靡常願聞鐘而早覺金城種
柳定學桓宣武之泣然元都看花猶幸劉賓客之重到當
如葛稚川之舊種與沖虛而並傳尙乞李供奉之留題有

慈恩之故事

寄蔡樹百光祿書

譚 瑩

五年契闊萬里音書擬垂郅暉之竿永弄陳遵之札比維
樹百先生壯懷翻日浩氣橫雲通縞紵於東南捧敦槃於
輦轂擲金龜以延客置驛騎以留賓偶乞假而返舊鄉辱
論交而呼小友飲原文字會有簪裾拓金戟於樽前謚洞
簫於座裏旣而餞離祖別道阻且長見芳草而憶王孫折
秋蘭而思公子亦謂士衡入洛當詣茂先將軍罷朝輒過
樓護丹陽品藻傳教以覓張憑伯喈風裁倒屣以迎王粲
而乃北征有賦西笑無緣技原諄乎屠龍夢難期乎得鹿
句止水田夏木好事仍傳篇無野火春風長安敢住楊子
幼有言長爲農夫以沒世人生行樂耳須富貴何時僕之

謂矣然而買田陽羨志願空賒卜宅江陵揶揄可想猶幸
高歌市上原有酒徒對飲車前未煩騶卒忍令眾人皆醉
欣然半道相要何曾五日不醒業謂此生足了龜腸蟬腹
夫復何言倘忽飛來誚雲閒之一鶴慣遲作答盼天上之
雙魚良時在茲榮問休暢風雨如晦關河欲霜持壺盍餉
元忠致書忽干仲寶全藉昭晰不知所云

新建粵秀山學海堂碑

譚瑩

昔文翁泣蜀肇闢膠庠常袞治閩聿脩橫宇亦謂往經頽
替待革榛狉於以啟滯而發蒙閉邪而反正若乃生徒濟
濟俎豆莘莘旣鱗萃而雲浮更煙霏而霧集猶復因前典
激餘風有闡揚景業之觀徒粉飾太平之具免絲燕麥楊
遵彥旣有微詞芻狗筌蹄馬貴與原非酷論欲聽聲而察
實在正本而澄源此世工詞賦而治經者乃欲名齋亦有
堂皇而行禮者別求起屋若我阮大司馬芸臺師新建粵
秀山學海堂其儒肆之津梁學庭之淵藪乎惟師南陽鮑
德東海劉寬以禮樂爲機籌以詩書爲鈐鍵讀齊太祖建
元之詔歲稔時和頒庾征西臨賀之條法清人貴環林璧

沼悉聽弦歌欄帶唐巾胥勤講肄精廬遞敝詎分龍節之
遙臨棘院重新示厪鵠袍之久立徵文考獻重編職志之
書舉首掄元迭冠科名之錄亦謂陶鈞庶品混一殊風演
迪斯文恢宏大道者已然而漢廷策偉非關掇拾之多唐
代詩工豈獨推敲之費

螭坳獻賦方留蓬島之間虎觀談經曾覩蒲輪之貴使其
探源星宿演派滄瀛雖卽海而觀瀾實分河而潤渚唯此
學製之錦豈曰濫吹之竽而迺質鼎爭操虛車竊御窮年
雪案守兔園冊子之編寸晷風簷摹鳳閣舍人之樣亦復
俯同拾芥仰類搶榆此虞溥因而寄慨於丹青殷茂所以
興嗟于蘭艾也師以崇化厲賢之職訂疑今察古之條於

月書季考之餘嚴義肆儒宗之選謂欲培其根柢則經史之須研謂欲擷其菁英則詩文之並重十題具發眾作競投入音列而一縣亦辨其鏗鏘五色陳而寸縷亦誇其璀璨及時並了勤無礙於照螢竟日未成瘁何嫌於祭獮而且親提玉尺並度金鍼宏獎性成品題價重高能備選時參博士冷官異等誰分半屬儒林老丈遂使百城之俊彥十郡之翹英莫不握素懷鉛銜華佩實璫璵璣匿采仁琢石而開瑩椒桂懷馨待披風而扇發師之法可謂良矣師之志亦云篤矣然猶難于其地也經營鴻構聿新羊石之遺基珍重璇題暫勝星泉之舊址崇墉美榭豈仁方來北宅南宮並爭先覩爰以道光四年秋九月經始於城北粵秀

山之麓焉嶺駐峯紆巖層岫衍川原開滌林藿綿濛暢萬里之幽情挹三城之秀色天連象郡平看五嶺之低地盡蠻江俯眺六龍之險珠江花月遙接南濠香閣經魚近連北郭棉紅榕綠極萬瓦之鱗差渚往汀還度千帆而羽集湛方生有言嶺舉雲霞之標澤流清曠之氣荆藍之璞豈不在茲以今方亶其然矣庀材度木掘土移山旣因樹而安窗更依泉而築徑虹粉藻梲梁卯煇黃槐宮亦遜其岌嶷堯豎乍驚其輪奐卽以是年冬十一月落成更於其後築至山之亭闢啟秀之宇不拘常憲應踰范甯之臺誰指吏曹更擬蘇瓊之館稷山非遠漫肆周游槐市依然甯無牆屋此焉棲寄實可憑衿矣嗟嗟千秋事業惟在名山

萬里功名尤爭綺歲吾粵山重水複地負海涵非無瑰異之才豈乏騫騰之輩然自

國初諸老漸慨凋零日下羣英爭誇撰述非不懷文抱質
拔藻摘華而求其下際上蟠兼收並蓄揆以寸心得失之
詣許以等身著作之才酌雅而稟經循名而責實雖專長
之偶擅已謙讓而未遑則瞻彼緝弧尤藉刮摩之力維茲
覆簣須程進止之功也他日者重花比葉勢悉干霄截貝
編璫光咸照月豈悠揚之無自知辟灌之有人而謂登斯
堂者能不愧想藥巴緬懷廉范也哉瑩羊鶴誰誇葉龍自
好望同庾乘參末坐而仍慙學異苻融逞游談而或詆自
憐小草屢藉掄揚深媿朽材難施樸斲幸登堂而寄興仍

角藝以程能聊綴緝其小言用恢張其盛舉天下之文章
在是南中之風會何如待游太學爲翟子超以刊碑喜識
荊州後王仲宣而作記

沈伯眉遺集序

譚 瑩

憶道光癸卯春訶林花田共結詞社始晤伯眉沈君交豈忘年才原名世寄愁與月刻意傷春鎮日嘔心仍愛錦囊之貯畢生低首甯徒寶劒之篇微雲疏雨之章聯吟激賞野火春風之什行卷交推耿介壹鬱楚人之意實傷磊落抑塞王郢之才誰拔卽中三影平子四愁生平實類鄒陽精采頗同宋玉迨咸豐甲寅冬疊鼓厭聞高軒忽過似劉琨之傷亂謂鍾期之賞音出祇陀菴集特命序焉好人譏彈使僕潤飾病同吳質嬾甚嵇康元晏著論竊愧太沖之賦君苗焚硯緣見士衡之文遷延因循曾未屬稿遂乃論園陳局開徑款門拜倪高士之生辰復吳清翁之舊社山

堂讀史講院稱詩住嶺海而憂生詣高涼而錄別以至滄
海橫流蕪城共賦家家賃廬各各移居沈下賢屢夢小勇
李博士曾逢豪客訪羅含之廢圃蘭菊叢生謁坡老之遺
臺松篁無恙小山桂樹隨地留人潭水桃花伊誰送汝合
稱才子賀季真醉擲金龜癖譽嬌兒王僧綽能堆蠟鳳謂
兒戀管幼安藜牀可坐白帽翛然杜子美草堂未營春衣
日典各賣珠而易米仍裁帖以乞花問校石與讐方話標
鐙而環炭星辰落落今雨泔泔愴絕昔游宛然隔世虎嘯
風生珠傷月死獻歲已延總帳兼旬乃造版門椒花之頌
不聞柏葉之觴誰酌雷霆未作霜雪載零芙蓉之鏡匣無
光苜蓿之盤飧曾飫三生杜牧坐禪榻而溘然三絕鄭虔

辦青瑣而竟天記法華之在手殉堯典以同棺玉樹長埋
金荃有集嗚呼痛哉猶憶端居多暇竟夕聽詩謂愁苦之
易工以悲哀而爲主酷如亡友

謂徐君夢秋文學

業作古人絕憐

騷屑之音大有蒼涼之感宜焚綺語永保遐齡詎料狂言
竟猶古讖嗟嗟少時常恐難踰知命之年微疾可痊遽赴
脩文之職宿草將列春蘭易萎泉壤旣邈若山河星霜殆
倏如露電愴懷逝者太息斯人孔少府之遺著漸湮馬文
園之叢稿誰覓夙詡後來王粲罕逢當代桓譚存詩若干
卷筱泉司馬特校刊焉原君耐久交也閒沿宋格實具唐
音殆衍派於曲江仍導源於太白振奇儷乎石鼎

二樵擷豔

等於梅邨霜辛露酸風恬月淡元裕之得幽并之間氣并

冤中州高季迪還初盛之舊觀鍼砭北地例以

國初諸老殆朱荔裳查初白之繼聲律以嶺外詞人亦孫
西庵黎瑤石之嗣響洵可傳矣風流頓盡梗槩猶存醴陵
之錦段如新謝傅之碎金無泯祝旂常兮再世託鉛槧以
千秋琴宛聽兮雍門笙倘吹於緱嶺知梁伯鸞之穿冢葬
近要離卹任彥升之遺孤論煩劉峻僅玉杯而問世同錦
琴之擅場遺書滿楹宜續蘭臺之史懸劒空壟宛報秣陵
之賤

柏靜濤師薜篴吟館集序

吳存義

夫東音南音萌芽五際義伯秋伯揮綽六瑩爰拊軒竹以還遞嬗伶簫之詠金石楹陛肴核騷雅淵哉鏤乎若迺畫日鏤管叢雲揆辭練骨九仙栞集一品則讀吾師靜濤夫子薜篴吟館集爲得未曾有也夫子翔華閨苑翼平辰衡抱鉤河摘洛之才贊枕石寢繩之化挈囊晨直緝亮六典散襟晚適孳精百家以故潤古雕今摘風裁興球鐘愈暢山水方滋存義雜誦旬時不揆溝沓蠡測所及敢獻咫聞今夫縹馬樊桐則千山斂其峩嶸浮槎渤澥則萬流失其齠澹是以長離之鳴引和七均粉絳之色度越三入繇斯該悃可得言焉昔之郊島冥搜自攜冰雪皮陸迭唱獨浪

煙霞類皆灌莽條寒候蟲響細夫子則冲偉

禁籟斫鱸蓬池近雲牖而居探金鎖之祕研書賞理酬沈
范於坐中敷衽奏懷羅籍湜於門下通讌紀夫

恩遇修豪稱乎德名玉樹千蕤布丹崖而寫影琅璈八奏
環翠水以尋聲此洵不可及也至若含香畫省珥筆華軒
魚須有書時對玉碣鶴蓋似水不離金溝境局者天易改
情囿者神多忘夫子則鋒車飄馭英簪星馳儲九能於槩
綿秣四牡於原隰東潏鳴淶南哦虎阜西隄函谷北揭淩
河雲物淪其神明山川盪其膈臆每當露晨煙夕驛古樹
新提琴命儔憑軾倚雅微微之景溢乎言表翬翬之思超
乎古初此又不可及也亦或少文撫絃靈運著屐探石禹

穴文獎奇氣縱舶僭耳詩挾異聲趣得寰中勢阻域外夫子則遠持龍節邁越馬韓較小貊之弓聽萬波之笛竹枝唱出裊海鶯花桂婁行來舞天竿瑟飛觴搏桑之側彈豪析木之墟排峯削青驚濤迴紫不獨聖俞斷句弓衣徧繡長慶新格雞林競求此又不可及也至於飆流所始緇繩殊塗獵豔則麗淫縋幽則案衍瓊琚玉軟不宜泉壑莊襟老帶詎合巖廊聲畫妍媸各有通蔽夫子則默會元解直舉性靈眾體畢賅意匠獨照其雕蔚爲顏謝其蕭曠爲王韋爲元白之瀏轉爲溫李之綺靡洞庭廣樂非振寡絲鄧林喬柯無取治葉此又不可及也存義仰餐沆瀣俯愧蹠泮緇帷廿年駑馬十駕難傳師鉢似隔塵因幸侍祖庭能

言珠色叩觚動墨欽心綴言庶幾三百之篇獎借端木六
一之集許與大蘇也歟

李鋤耑自適齋詩序

吳存義

夫霜鐘秋肅叶笙竽而斟酌調蓮鶚晝寒裁花葉而寡韻鎮浮之響厲則伶簫之和難也飄影之鋒偶則馨逸之致少也是以食艾三斗罕聞絃匏綰符半通多棄觚翰雖五事同舉而九能何稱今讀自適齋集而知循吏廉能之最卽風人敦厚之遺也鋤耑明府鳳羽早騫足中繫以六驗八觀之事試四始五際之才推荀淑爲神君屈王述以小縣黃特初下白雀忽翔金心在中銀手能斷拔薤一本鉤距不施歌棠三章淵色自詰頻膺赤緊皆暢黃流可謂皚雪將將英風翬翬矣及其墨煙灑夕豪露彈秋可徵可商乍幽乍蔚抽冰絲而亦煖叩鏤管而能香何以芳芬悱惻

之情溢於綺縟紛葩之表也乃知懷袁甫之錦故能垂顗
之之簾叩吳湊之鞍故能飛華覈之翰每當庭莎釀綠花
雨流紅秋絃夕張春醪晨撫雞碑雀錄吏爲鈔書而來梓
瑟桐琴鳥亦聽歌不去迺集才人於幕府選韻事於吟箋
以大雅材作小海唱對花據石寫彼紅情攀條拂雲恣其
翠詭結崇蘭之佩同岑可懷狎故鄉之鷗前盟不冷球鐘
旣暢觴詠方滋斯則伯生之詩亦如老吏太白之胄本屬
仙才宜乎聽畫一之歌印牀花落門尖叉之韻官閣鐙涼
所惜揚子江長柴墟地僻曉來挂笏無處看山醉後提琴
何從嘯侶然而煙賞未接霞情自舒柳底放衙酒邊擊鉢
綿槩一握金石千聲流逸藻以切今振芳塵而轢古一官

一集請儲梨棗以刊三沐三薰好盥蓄薇而讀

孫伯澂讀雪齋詩集序

吳存義

夫春牧翹萑秋林悴葉應乎候也潛鱗媚壑翕羽依巖區
乎境也是故金石雲陸謳吟垌野無端而璇樞測彗砥路
鳴桴則愼矣陳局露初奠爵星晚無端而闐驚燧影席駭
梯衝則警矣時非天寶官非拾遺無疾唸呶見譏往哲茲
讀伯澂詩集蒙竊感焉伯澂淵懿儲材化離遭遇思鬱悱
惻詞攄邈綿援琴雍門聽者睫泣擊筑易水歌之颿起達
情該悒雅近杜陵蓋自氛闇潢池江屯鱣鱣石城雲壓鐵
鎖波沈地出蒼鵝桁焚朱雀電輪風馬蔣祠不靈玉帳牙
旗天塹失險於是庾信竄於荒谷阮籍哭於窮途躑躅蕪
城羈棲茂苑露餐拾橡水宿藏蘆蹠躑戈鋌竭來豺虎遠

接平陰之信近奉河陽之興霜霰飛蓬江湖短褐李邕識
面王翰卜鄰席帽麻屨掖垣何遠書籤藥裏幕府是依漚
上寄塵瀼西儼築矣兼以五原壁壘一劒崆峒憤策花門
悲吟青坂諷石壕吏和春陵行擬七歌之駕鵞賦八哀於
江漢青煙白骨悽愴國殤朔雪炎風激昂諸將亦或舞筵
絲竹畫障雲巒檐花酌春梁月照夢無不纏緜苑結幽藹
嶽崎是則叩宮甘生彈徵苦發循聲定響嗣武少陵時爲
之耶境爲之耶方今山華嶽曜河濂海夷丹冥投筆青微
釋警文騶儷迹嘉穎鋪棻庭列球鐘林無韋帶吾知伯激
容與書囿婆娑翰林詠朱草於軒墀奏白華於笙琯將繼
臣甫賦三大禮也

左夫人碧梧紅蕉吟館詩稿序

何 棧

劉家三妹比傳俳詠之工左氏一門早識芬詞之豔輯玉
臺新咏粉印方鮮數錦瑟華年冰絃轉咽苦調忽彈夫寡
鵠幽思猶繞於春蠶雖韻寂璜牙遽撤北宮之環瑱而香
融繡口工摹南海之鑑鑿此蓋吾亡友袁厚安同年繼室
左夫人作也幼嫻姆教多讀父書絳樹能吟紺華在唾當
夫金龜得壻銀鹿弄兒刻華燭以研思倚熏籠而索句仙
人甲帳芸籤排寫韻之樓元日辛盤椒頌薦迎春之閣雙
心一袂纏絲自結襟情萬草千花熨帖難尋綫迹上風鳴
而下風應各暢元音春月喜而秋月愁頻酬好語信乎影
形互贈福慧交修者矣旣而司馬倦游芙蓉坐對修蛾感

損芍藥歌離佩諷聊足忘憂食檠未嘗言苦寄若蘭之錦
回文巧若璇璣誦徐淑之書好事爭爲什襲固宜椒風儷
迹松雪齊稱夫豈鄰於紅葉寄愁黃花比瘦者耶乃至柔
之從宦伯也執爰劫起紅羊去同黃鶴藁砧何在目斷刀
環華表不歸口銜石闕竹惟有淚桃本無言此則蘊結冰
懷任春風而不煖懣除綺語與秋月以皆澄矣惟此一編
爲之三嘆繹國風之旨何疑周姥能詩續女典之篇豈讓
班家作誡閒氣獨鍾於女子秀擢荃蘅知音謬附於中郎
奇搜桐竹琢玉截金之句果然道韞多才彈冠結綬之交
獨有君甯知狀辨莫邪縵理足徵爪髮之華索皇甫序言
何惜齒牙之論

薛慰農司馬香草閒情詩序

何 棻

夢裏蘅蕪漢寢之遺香宛在吟邊蘭杜楚騷之幽怨如何
飛絮落花夙有因依之分倡條冶葉新留護惜之緣是以
賦罷蕪城夢回芝館證果於陳芳之國乞靈於聚窟之山
吳質所爲長愁江淹於焉多恨也茲以德音鸞鸞之才仿
崔珣鴛鴦之什當眉寫翠繪絕豔於唐宮在髻爲釵締深
情於陶令三十段明光之曲挑徹琴心百一篇隱喻之辭
撥開鞋耳玉溪錦瑟細數華年金谷瑤觴忽刊陳迹襟上
之酒痕已舊壺中之墨汁方新信春士之思多匪冬郎之
體弱固宜浣薔薇而雒誦嗅薝蔔以參禪矣有如名重姚
黃品妍歐碧蕊珠絢影茗玉鐙聲小宋偷呼蓬山更遠前

劉復返藥徑旋迷泥油碧之車何處迎來小小漉綵灰之
酒幾時喚起眞眞豈若椒風引笑蘭露猜唬添螺黛於雙
睂約鴉黃於半額枇杷花下一往情深豆蔻梢頭十分春
滿蓉裳荔帶長開對舞之筵蓀壁蕙榜小拓藏嬌之屋旣
乃贈將芍藥開到荼蘼骨瘦香桃淚滋斑竹黃楊小厄願
願不閏之年紅豆叢生厯厯相思之種悵蹠聲之遽遠綠
黯裙腰憐唾色之猶鮮紺凝袖角甚或綠華影謝絳樹歌
沈沒綦迹於苔階斂袿熏於盡篋玉鉤斜畔名寂寂以誰
題銀燭光中步姍姍而欲活春風榆莢猶飛買笑之錢秋
月芒蘿虛攝效顰之鏡是則新蕉抽卷難舒層疊之思斷
藕牽絲枉抱纏綿之緒返魂有術筆尖開押不盧花微笑

無言座下契阿那迦葉如僕者在山遠志虛憶當歸出水
夫容翻憐獨活雲拋杖底尋華撥以何年月墮泥中訛鞠
窮而如昨紅椒合口無語含辛黃檗生牙有情最苦載繹
瑤華之唱如聆玉樹之歌記前事於紺珠悟後因於金粟
迭迷艾蒨三薰麗正之文茉莉素馨四照華嚴之界蒸成
芝菌於斯詹文字之祥佩當萱蘇足以起幽憂之疾

潘順之吉士岱頂看雲圖序

馮桂芬

士人桑蓬載縣早兆四方之志山川能說便矢五嶽之約顧抱願者輒窘於力具力者又閼於時力猶易勉時彌難言或倖得而違之或不謀而獲之是有數存非可意強若潘子岱頂看雲之游斯足羨已甲辰夏五君以是圖示僕屬爲序言聚三吳之畫苑貌萬仞之奇峯冷訝杉松隱含煙霧幾於生堂上之丹楓插壁閒以青嶂僕尋被

詔書于役嶺右載展圖經道宜衡麓私心竊喜夸詫於君謂方將躡祝融之峯宿上封之寺迂搏桑之初日撻石廩之奧雲別爲一圖歸以相質且與君分東南以占勝據齊楚以絜大然後借君瑰詞償我俚語不亦可乎旣而背秋

涉冬簡書戴役浮離江截瀟水盡三湘之勝窺九面之奇
青入簷底境訝霄外無何抵衡山縣先夕戒僕襆被具裝
雨聲俄來中夜徹曙莽雲霧以萬重隔芙蓉於咫尺留滯
一昔游興未衰過雨看山遂至嶽廟廟之北戶小阜隆起
躡履而上羣峯四環離離蔚蔚乃在霞氣之表隱隱鱗鱗
時露翠微之徑宿漬未已夕霾又升愧乏昌黎開雲之誠
止餘少文臥游之想愴恨言別期以後舉而已乃歎劉敞
過人恃濟勝之有具道元注經詡山靈之知己謂爲奇緣
果非虛語棖觸前願吾滋惡焉泰山在泰安府境扼齊魯
之界居南北之衝九達傳自往古四方莫不來會祇以山
徑瑩确僕夫痛吁避如重關畏等九折迤西百里地接兗

州昔日沮洳今時原隰十數年來連軌結軫改由於彼秦
郡通衢弗可行經履之客百不得一僕計偕者五假省
者一往來山左十有一度曾未得問車石之舊蹤涉環道
之近界獨君之游也以戊戌之夏時君充貢試

闕被擯南歸屬秋潦浩汗山溪猥至中達絕軌改轍高岡
天與奇遇成茲壯游武陵漁人迷路乃入桃源若虛狂客
塵中忽造仙府偉哉此行豈偶然邪若僕者振衣無因自
厓空返於東旣嘗十至而不能望於南復如三山之不可
卽漫勞仰止笑塵俗之走抗願佩真形但夢魂之飛越披
君是圖徒自點耳雖然山不削峻以副陟道非迴直以就
紆光陰瞬馳蹉跎能幾一官雞肋頗倦春明之游七月鱸

美早觸秋風之思誓當攜手煙蘿借訪林澗窮石壁之官
篠窺天門之寥遼上捫列宿通呼吸於九重俯瞰眾山笑
培塿於一覽遂乃探岫嶺之牒蔭壁珪之樹攀藤藉草信
宿雲臺之觀栖素餌芝嘯傲逍遙之谷貯蒼翠於袖底載
煙霞於裝次導以先路示我周行將在於君書此爲券至
於崔巍之象登攬之勝刻畫奇怪旣慙腕弱之難勝絕鑿
幽險矧非身履不能道頗羞學語無敢譎言

五湖漁莊圖序

馮桂芬

夫富春江上子陵之羊裘長著西塞山前志和之鷺艇不歸大都豹隱之流多與鱸鄉爲伍則如具區五聚之水洞庭第九之天齋號可詩墅名賭弈楊枝春雨荻花秋雪近傍角里之邨遙接運期之廡蓋吾友葉子漁莊之所居也漁莊生於通德之門少擅豪氣之譽固宜待詔於金馬揚名於鳳池而乃聽笠澤之鴨聲知尙湖之魚樂逋客斯謝故山卜居豈不遠過萊子更無來聘之金敢笑陶公尙有可解之組乎而且百城擁書後車問字貰臨邛之酒索灞岸之吟月中松子俱入琴聲霜餘橘葉儘供圖畫斯又西泠販夫望落梅而下拜輞川浣女過深竹而聽詩者已惟

續五

五

是白水盟在竟刺鹿門之船緇塵道長方走長安之馬漁
莊其何以教我焉

帝女花傳奇序

許麗京

情天有恨媧皇之術誰傳冤海難填精衛之誠徒抱然而
明妃月冷猶歸環佩之魂紫玉煙沈尙想衣裳之色豨豪
魚網奇情畢宣鳳管鴟絃豔響斯發何況地老天荒以後
破鏡重圓珠聯璧合而還芳華頓歇者乎維昔有明之季
魔騰阿辇玉弩雷轟運盡鍾離金甌瓦裂戚畹擁陶朱之
富貂璫盡恭顯之餘力戰將軍虎皮安在迎降豎子狗尾
爭搖遂至豕突三關鴟鳴九殿邦國殄瘁傷矣君哉假令
匕鬯不驚鐘簷無恙王姬下嫁早賦穠華快壻封侯偕居
貳室將見乘鳳仙史並吹天上之簫奚煩鼓瑟湘靈更譜
人間之曲無如徧地橫流飄零玉杵燒空劫火隔斷銀河

家國之故難言兒女之私誰託怒散衝冠之髮走訴高皇
狂揮指日之戈摧傷貴主非思陵之忍也蓋情有不得已
焉斯時也海棠雙樹杜宇哀號仙杏一枝嬋娟宛轉春蠶
命薄誰延續命之絲倩女魂離安問返魂之術所幸多生
公案赤繩已牽萬縷塵緣青萍未斷回天無力可憐曙後
星光擣藥有方特返雲邊月魄痛一代金枝玉葉竟隨瓊
樹花凋問九重鳳閣鸞臺忍見銅仙淚下三千里龍驤軍
至刁斗森然五百年麟脯筵開滄桑變矣俄焉黃巾電掃
碧落氛清人民半非城郭猶是宮人未老已談天寶當年
燕子不來莫認王侯故宅匪無家蔡女猶思故劍可尋匪
織錦蘇娘應念葉砧安在龍蛇潛於野外靡蕪滿于山頭

銜石闕以無言悵瑤琴之弗御此則形單影隻願禮空王
雨苦風淒徒傷先帝者也我

國家宏慈幼之仁廣推恩之義據陳情之表循旁求之招
詔許完姻備其田宅典至盛也禮亦宜之雖然身非金石
感極山河道異神仙櫻茲疾疾妝樓春到淒涼賦合卷之
詩故國悲來慷慨泣畫眉之筆三更噩夢鐵騎憑陵九死
餘哀鮫珠迸落護草無忘憂之用金屋豈貯愁之區宜其
一病慙慙雙星脈脈參苓投于水火精氣汨乎陰陽白露
旣零黃腸永閉啜其泣矣命實爲之嗟乎結璘有悔不聞
游戲塵寰寶婺鍾靈何事託生帝室聽笙歌於緱嶺棖觸
蓉城邀媒灼於仙鄉留連桃洞巫峽感瑤姬之夢宋玉荒

唐雲駢降蔡經之家麻姑狡獪拈花微笑大有姻緣墮劫
諸天還多煩惱韻珊黃君獨參妙旨鬱爲宏詞覺情文之
相生悟色空之卽是鋤奸攄憤鐵筆森嚴對酒當歌唾壺
碎缺借前朝之幽怨刻羽引商仗我佛之慈悲驚神泣鬼
此帝女花傳奇之所由作也古直蒼涼則曹公樂府哀感
頑豔則玉茗風流事以信而可徵言以婉而多諷收二百
餘年之全局才學識應許兼長喚大千世界之浮生戒定
慧將無一貫昌黎曰假善鳴者而使之鳴直其然乎讀是
曲者當不以鄙言爲阿諛也

帝女花傳奇自序

黃變清

嗟乎循環生死神仙無了結之期俛仰興亡宇宙皆貽悲之境大江東去挽不住恨水波濤小海西流問不出冤禽消息況乃帝王骨肉鬱痛千年兒女江山同聲一哭如明季長平公主者尤足動廢書之長歎愴思古之幽懷者也當夫仙李蟠雲穠桃承露瓊樓金屋聲叶珩璜翠水瑤池豔傾菡萏體裁玉琢香生鸞鳳之胎掌上珠珍出自驪龍之頷眉猶待畫眉問誰齊宜遵受冊之儀賜封大國遂詔司禮之監妙選良家則有周君世顯者平叔風標鴻圖氣節以閼闔之華裔締滄汭之良嫔合璧有期射屏適中一絲采縷煩月老之牽來兩鬢宮花待日兄之賜插豈意惡

氛徒熾好事多磨鴛偶未諧狗噬將及當紅葉蹇修之會
正赤睂潑燄之秋敗報星馳警函雨集魯陽老去誰揮指
日之戈后羿飛行竟發射天之箭謂神器可以力取虎豹
磨牙恨肉食未能遠謀牛羊崩角彊藩縱敵仍膺侯伯之
封貴戚守財尙作子孫之計六師皆墨九廟齊灰朝內可
謂無人國事至于此極青蛇墮殿知東漢之垂亡白燕渡
江慨南宋之不振殘棋絕援餘燼難收戰血模糊冷浸中
原之草鬼燐黯澹青燒半夜之雲撥兒馬卷地而來誰爲
泥封函谷孩子軍梯城而上竟使鞞踢神京烈皇於是淚
濺重袍手提鋸刃六宮矢節一日捐軀國母旣誓以摩笄
貴主亦因之掩魄三百餘年社稷付之地老天荒一十五

歲嬋娟同此風酸雨苦旣乃載歸椒里溫以蘭衾斷骨重
連餘絲猶裹活雙鬢之冷翠蟬翅蓬鬆認半臂之殘膏猩
痕斑剝前身青女帶來冰雪之災小影麻姑閱此滄桑之
癡銅人泣露悲哉九月涼秋石馬嘶風消盡五陵佳氣涸
鼎湖之龍穴無計攀髯傾阿閣之鳳巢僅存完卵華陽多
病嬌小可憐臨海無家飄流何底半生厯劫已空玉鏡之
塵一表陳情乞下金仙之髮恭逢我

聖朝蕩平寇黨撫馭寰瀛

闡澤溢於普天

隆恩推于勝國太息蘭魂楚楚亦王者香之根苗豈宜曇
影空空爲波斯匿之舉動

詔合故劒膏續離絃館擬平陽禮從優異宅方沁水春自
繁華車犢三千爭看騎奴之送金錢百萬無須牛女之償
旛護餘芳鏡圓前影目憐魚比翼稱鸚飛然而夙痛未捐
煩冤常鬱亂離如夢愁談天寶年間金粉成煙莫問上陽
院落回思往事憂來無方陡撫殘創魂銷欲絕阿嬌新貶
漫誇眷屬同仙望帝不歸無復爺孃喚女盡埽洛陽之紙
莫罄悲腸便傾滄海之波難完恨淚棟花太苦桐葉先零
三尺瓊簫吹落秦樓之月半牀錦被寒沈楚岫之雲遂使
奉倩銜哀安仁茹戚檢箱中之紈綺依然餘唾猶存燒帳
外之蘅蕪難望香魂再返一年顰笑了此塵緣孤塚淒涼
埋茲豔骨飛來蝴蝶還疑舊日羅裙唬煞杜鵑斷送春風

錦韞浪說大時憐。堦甘隨諸妹於黃泉。倘從地下尋親定。
問烈皇于紅閣。吁其戚矣命也如何。僕本恨人。史傳遺事。
撫青編而流覽。愁寄天邊。憐紫玉之銷沈。心傷局外。援少
陵詠懷之例。寫太傅絲竹之情。敘作四萬言臚分二十闕。
聲捐靡曼。不同燕子吟箋。事涉盛衰。竊比桃花畫扇。彰義
門收場。淒惻渺渺兮。余懷眾香國。說法荒唐。非非有之。想
弔靈紉於湘江水上。權爲楚客招魂。按檀板于梨園部中。
尙待周郎顧誤。

與汪甥鏡初書

謝質卿

蓋聞江海之大川瀆知歸嵩岱之高風雲競會地博則物
附類聚則用宏是以接楨幹者必入乎鄧林索珍奇者必
游于王市若夫萬方輻輳之區羣彥星羅之域連犖諸夏
厥惟京師方今四門啟鑰八紘振綱舉凡衡室寒峻隴畝
鄙生靡不思奮翼天衢觀光上國南金北銑接軫雲來九
陌八街聯裾霧集濟濟穆穆煌然巨觀吾甥翱翔日下瞻
仰神畿薰心醺粹之儒結契方聞之士在此會矣然而浩
穰之中流品雜厠淄澠易淆朱紫宜辨故特以素所習見
者約略陳之青衿少年翩翩裙屐襲充賦之虛聲攬皇州
之瑋麗廣場飛轡貨隧迷神旗亭醉花笙歌悅魄紛鶩棟

極流蕩忘返此爲佻達之子無足與言其或魚質自銜燕
石求沽挾巾箱爲禽犢恃竿牘爲榮梯朝謁金張之門夜
客梁竇之第戢屨杖策刺促不休考其材藝亦足以膺尉
薦博巍科而衣錦吹笙善於附會情等倚市君子鄙之又
有假館淨坊閉廬伏誦摹帖括之文不失圭撮奉登科之
記勞其夢魂夫固夏課維勤揣摩技熟矣顧伸其佔畢罔
非俗檢叩以典素詫爲異書良由風尙趨承具有程式苟
得著錄何取淹通父兄傳其家法師友以爲激揚遂使三
史挂壁六籍埋塵白首黃童同出一軌英資偉質於此銷
磨良可慨已于是二三雋侶鑒彼容容別爲一隊糠粃兔
園之冊漁獵鴻寶之篇晨觴夕茗樹幟騷壇飛馬騁其雄

辭雕龍恣其逸辯非不懸河瀉水生潤邱陵錦粲珠罪揆
張風月究之七略九流但資耳食蕞殘玉屑奚裨心齋雖
清談揮麈雅附名流而妄肆雌黃坐荒蛾術抑亦學人之
通病也若乃瑾瑜在握琴瑟其音塵積牀篋門謝軒冕菲
史枕經恥改雅而入鄭方領矩步甘違俗以異人躡躡金
臺如游蓬戶探源學海不尙卮言所謂潔操履之拘全拔
萃之業者殆其人與夫蓺蘭芳澤必舉其蕭稂采玉崑岡
當掇其瑕礫願吾甥謝不心之朋求翕羽之助刻象爲楮
毋囿于一葉之能綴狐爲裘要取之眾曰而粹粗梨橘柚
可口惟良騏驥駢駟相皮多失染蒼染黃慎其習如水如
醴味其眞屏絕五交投分三益庶幾資爾鑄心益光明鏡

借彼鋤色時變素絲壯哉天府滿目琳琅虛往實歸斯爲
快意耳昔任安少游太學數經兼通程曾受業長安百篇
書著追琢其章蔚爲國寶將于吾甥望之矣

靜樂軒玩月記

謝質卿

元英告冥銅史促漏抱牘之吏退休于舍執燭之僮倦倚
于壁兀坐枯寂出步前除灝氣迎人明月作晝吐華東嶺
俄已曖空度影南端遲乃升屋藹藹之陰散若澄采溶溶
之色流爲素波霜花轉媚冰苔自清眾籟無諠蕭然獨立
寒柯交蔭微嫌蔽明中庭一方竊笑窺井軒之東偏舊有
土阜陟彼縱目霄宇一闊梁山嵯峨石骨峭露指揮雲樹
不隔纖翳回眺城闕雉堞如畫俯瞰市廛鱗瓦可數迢迢
銀漢濯魄有聲厯厯珠斗引袖欲落游心太虛頗涉遐想
追憶廣陵三五之夕招攜勝友泛舟虹橋藉月爲席粲列
瓜李仰天而歌韻激泉石叱纖阿使彌轡呼姮娥以侑觴

直欲追元兔捉詹諸婆娑閭扶相與駘蕩旣而蟻槐岸隈
弄笛林樾零露如沐依然脫巾玉繩漸低猶戀餘景狂興
無極渾忘朝昏詎意人境旣杳塵劫又深風亭水榭泯化
寒灰白骨黃沙幽栖燐火妖星燭地毒霧漫天二弦失規
萬象常晦山川黯淡南望歛歔然而瞻彼中原樂國安適
如此良夜延賞幾人昭昭圓靈照臨斯土邇尤無吠祠狐
不鳴於焉逍遙實乃天幸況乎傳舍偶寄清光難留情移
境遷後將誰屬匪託私載曷申曠懷於是悟盈虧之理證
去來之因感深故吾趣永今夕濡毫以記映輝而書斜輪
西傾頽然就寢悠悠夢幻不知所之

華山游草序

謝質卿

蓋聞樂山曰惟仁者登高賦之大夫艮止契符沖深岫壑
坤輿紀蹟文成範模苟結願於景行必馳神夫雄竦顧乃
興言陟彼簡書尼之濟勝無具荆棘防之田廬伏處難爲
物外之游婚嫁溷人空設天際之想是非身抱仙骨安能
締茲夙緣乎穎叔方伯樹烈巖峙寄情雲高釋袞而舞萊
斑策杖而披蘿薜仰瞻西岳實鎮金天旣入終南夢通石
闕維時吾宗枚如羈栖此邦雅有同志於是裹糧十日蠟
屐一雙追軌於向禽博趣於莊惠始躋少華循先河後海
之義遂躡天磴探翠崖丹谷之奇試膽力於鉤梯鑑鬚眉
於泉澗攀繩緣壁橋若朶升攢劒拖紳奚待鹿駕踏蒼龍

之脊風雷盪魂摩落雁之顛日月懸肘沐浴以天池爲戲
呼吸則帝座可通仝倕爲傳夔魑遁迹笑昌黎之何怯傲
希夷而不眠壯哉此行厥觀偉矣今夫雲臺采藥時有羽
人青柯刈薪亦多樵客然而煙霞過眼萬變不涉於懷金
石無聲疊秀孰宣其奧二子則吐飲清顓陶鎔古天履險
蹈危率爾休暢星餐露宿夷然嘯歌窮千嶺以雕鏤啟七
宮之幽祕蓮花點筆塵氛自消瀑布霏襟仙籟相答巨靈
爲之鼓掌毛女顧而解顏回憩玉泉行篋殆滿紆轡桃塞
賈勇有餘蓋其軼埃壚搏扶搖叩元局通道域三峯在握
虛往實歸將罄蓐收之真藏固異寶山之空入也質卿性
囿拘墟識卑培塿未臨厓而擦耳已望石而同心快哦太

白之篇慨焉搔首如近公超之市頓豁迷矇因思浩氣內
充壯往无悔峻節孤聳元箸特超聆厥音徹足振柔懦後
有繼者不必考志乘按圖經而循覽瑤華遐想秋駕當亦
會心不遠也已

續五

五

文十

國朝駢體正宗續編卷五

受業高安鄒淩瀚校